



Public Interest  
Advocacy Center

## SVI BUDŽETI NA JEDNOM MJESTU

**Prikupljeni svi dostupni dokumenti o izvršenju budžeta na nivou kantona, entiteta, države i distrikta Brčko od 2005 do danas – Web stranicu pokrenuo g.Allan Reed, direktor misije USAID u Bosni i Hercegovini - Brojač pokazuje da država potroši prosječno 267 KM svake sekunde**

(SARAJEVO, 06.07.2010) – Fondacija CPI pokrenula je web stranicu [www.cpi.ba](http://www.cpi.ba) koja sadrži sve dostupne dokumente o izvršenju budžeta države, entiteta, kantona i distrikta Brčko od 2005. do danas. Na taj način omogućen je uvid u javnu potrošnju građanima, novinarima, organizacijama civilnog društva i finansijskim ekspertima.

Projekt je realiziran uz pomoć Fonda otvoreno društvo Bosne i Hercegovine i Centra Civilnih Inicijativa kroz projekat CAPP II koji je podržao USAID. **G. Allan Reed, direktor misije USAID-a u Bosni i Hercegovini** je simboličnom prvom pretragom baze podataka pokrenuo ovaj servis i tom prilikom je istaknuo da je “pokretanje ovog internetskog alata samo prvi korak, a najvažniji posao treba da obave građani, nevladine organizacije i novinari koji će ga koristiti u svom istraživačkom radu.” On je u svom izlaganju posebno naglasio da “vlada mora transparentno trošiti sredstva, a poreski obveznici imaju pravo da znaju kako se troši njihov novac. “

U bazu podataka uneseno je oko 7 000 tabela koje je CPI prikupio kroz pretplatu na službena glasila u kojima se objavljuju, kroz korespondenciju sa državnim institucijama kao i uz primjenu Zakona o slobodi pristupa informacijama. **Damir Mehmedbašić, savjetnik za javne finansije Fondacije CPI**, prezentirao je sadržaj baze podataka i brojne prepreke koje stoje između građana i podataka o javnoj potrošnji. „U načinu na koji razni nivoi državne vlasti izvještavaju o svojoj potrošnji postoje mnoge manjkavosti, koje će biti predmetom dalje analize ali pozivamo i građane i druge organizacije da naprave vlastite analize i komentare budžeta koji su sada svima dostupni.“

Prema dokumentu koje su naše vlasti potpisale sa MMF-om, budžeti navedenih nivoa vlasti i općina u 2010. godini planiran je na razini od 8 milijardi i 423 milijuna konvertibilnih maraka. Znači da svake sekunde, i danju i noću, državni budžeti troše prosječno 267 konvertibilnih maraka. Brojač javnih finansija, koji je takodjer danas predstavljen javnosti, množi broj sekundi koji je prošao od početka godine sa prosječnom potrošnjom. Brojač je u ime građana predstavila **gospođa Zulejha Hrlović**, građaninica Sarajeva poznata prodavačica novina u centru grada. „Pogledala sam jutros brojač i pokazivao je da je od 1. januara do danas potrošeno preko 4 milijarde i 300 milijuna konvertibilnih maraka. To su pare koje mi svi uplaćujemo, kroz poreze, carine i doprinose, novac koji uplaćuju firme ljudi koji su zaposleni. Teško se živi i moramo paziti da se te pare stvarno i troše u korist građana koji pune budžete.“

Pokretanje baze podataka i brojača javne potrošnje samo je prva faza djelovanja Fondacije CPI, nakon koje slijede informativne i edukativne kampanje koje će široj javnosti prezentirati najvažnije činjenice o javnoj potrošnji u Bosni i Hercegovini.

